

Semangat Nenggiri bayangi keputusan PRK DUN Mahkota

Oleh Prof Dr Rusdi Omar
bhrencana@bh.com.my



Penganalisis dan pemerhati politik

Esok adalah hari penentuan siapa bakal terpilih sebagai Ahli Yang Berhormat (YB) baharu bagi Dewan Undangan Negeri (DUN) Mahkota, Kluang, Johor. Pelbagai ramalan, telahan dan culaan dilakukan penganalisis namun, keputusan akhir bergantung kepada keputusan pengundi.

Apa yang pasti, pertembungan satu lawan satu memudahkan percaturan dan strategi parti serta calon bertanding pada Pilihan Raya Kecil (PRK) itu, antara calon Barisan Nasional (BN), Syed Hussien Syed Abdullah dan Mohamad Haizan Jaafar daripada Perikatan Nasional (PN).

Namun, sukar untuk menafikan terdapat gambaran positif awal mengapa BN dilihat lebih berpeluang mempertahankan DUN Mahkota berbanding PN. Antaranya kemenangan besar BN pada PRK DUN Nenggiri pada 17 Ogos lalu.

Keputusan di Nenggiri memberikan momentum positif kepada jentera BN di seluruh negara, mencipta keyakinan pengundi terhadap keupayaan BN untuk terus menang yang mana aura kemenangan ini dirasakan pengundi di Mahkota.

Sama seperti di Nenggiri, BN mengumumkan Syed Hussien sebagai calon lebih awal berbanding PN. Ini memberikan masa mencukupi untuk BN merancang strategi kempen secara lebih teratur dan mendekati pengundi lebih berkesan, sementara PN dilihat ketinggalan dari segi persediaan awal.

BN menggunakan strategi ceramah kelompok berkesan pada PRK Nenggiri, membolehkan me-

reka berinteraksi secara langsung dengan pengundi dalam kumpulan kecil. Strategi ini berjaya di Nenggiri dan mungkin berulang kejayaan di Mahkota.

Faktor calon turut dilihat memberi kesan kepada naluri pengundi, Syed Hussien, 40, adalah Ketua Pemuda UMNO Kluang dan lebih dekat dengan pengundi muda.

BN turut mendapat sokongan penuh daripada komponen Kerajaan Perpaduan khususnya DAP, MCA, dan MIC. Tiada lagi isu antara UMNO dengan MCA dan MIC yang akan memobilisasi undi pengundi Cina dan India, sekali gus meningkatkan peluang kemenangan BN.



“Faktor calon turut dilihat memberi kesan kepada naluri pengundi, Syed Hussien, 40, adalah Ketua Pemuda UMNO Kluang dan lebih dekat dengan pengundi muda”

Sementara itu, keadaan ekonomi negara semakin pulih di bawah pemerintahan Perdana Menteri, Datuk Seri Anwar Ibrahim di samping pentadbiran Menteri Besar Johor, Datuk Onn Hafiz Ghazi yang stabil tanpa isu besar, memberikan keyakinan kepada pengundi di DUN Mahkota untuk kekal memilih BN sebagai pembawa

suara mereka.

Kempen berjalan aman

Dapat dilihat, kempen PRK DUN Mahkota berjalan aman tanpa isu sensitif seperti kaum, agama, dan raja (3R) dimainkan mana-mana pihak. Ini memastikan fokus pengundi kekal kepada calon dan dasar ditawarkan.

Seruan Timbalan Pengerusi BN, Datuk Seri Utama Mohamad Hassan, supaya penyokong BN tidak terbawa-bawa dengan emosi sekiranya calon pilihan mereka tidak dicalonkan berjaya memastikan jentera BN beroperasi dengan penuh disiplin dan fokus berkempen.

Dalam pada itu, PN mengakui mereka berdepan kesukaran untuk meraih undi daripada pengundi Cina yang membentuk 34 peratus daripada jumlah pengundi di Mahkota walaupun cuba mengeksploitasi isu sijil halal.

Kegagalan PN memenangi sokongan pengundi Cina memberi kelebihan besar kepada Syed Hussien, yang turut mendapat sokongan kempen daripada DAP dan MCA dalam menarik undi komuniti Cina.

Walau apa pun jangkaan dan ramalan dibangkitkan, segala-galanya bergantung kepada kehendak serta naluri pengundi DUN Mahkota esok.